

O faia'oga mea uma lava

Masiofo Filifilia Tamasese



O le mataupu na tuuina mai e le Ofisa ia te a'u o loo faa'upuina i le gagana Peretania "all for education" ma ua ou faauigaina o mea uma mo a'oga. Soo se mea e maua ai le a'oga, e mafai ona faia'oga mai ia i tatou. E mafai ona faia'oga mai le la, le masina, le fetu, le paneta, le si'osi'omaga, le tagata.

E mafai ona faia'oga matua, faifeau, faia'oga, tagata matutua ma tagata talavou. E mafai ona faia'oga tagata talavou auā fai mai le Tusi Paia "e fai miti a toeaiina, e iloa foi faaaliga e taulele'a".

E mafai ona faia'oga le tagata matua ae mafai foi ona faia'oga le tagata talavou – auā e le faapito le fe'au a le Atua i le tagata matua, e le faapito foi i le tagata talavou. O se taimi ua auala mai le fe'au a le Atua i le tagata matua, o se taimi ua auala mai le fe'au a le Atua i letagata talavou. O ai lava o i la'ua ua momoli iai le fe'au a le Atua e avanoa ona faia'oga mai ia i tatou.

E faia'oga mai foi le la, le masina, fetu faapea ai ma paneta ia i tatou, auā latou te faailoilo mai le vaitau o faiga faiva ma vaitau o folauga, le mafua o laau ma le vaitau o toufi.

E mafua isea ona faaigoa le Auala a Solosolo o le Maile? Auā e iai a'oga taua e maua mai i aga a le maile. E mafua isea le Auala a Falefa lea e faaigoa o le Laumei? Auā e iai le fé'au e momoli mai e le 'anava a le laumei.

E mafua isea le tima'i a le Tusi Paia e te alu e a'o mai sau amio i aga a le loi? Auā e maua mai ai lau a'oga i le galuega e fai to'aga ma le tau'i o lena galuega.

Fai mai se mau 'autu a le Mataupu Silisili ma Saienisi, e vaevaeina mea uma o le lalolagi i mea e ola ma mea e le ola (animate and inanimate). O lea la, fai mai latou o le maa e le ola ona e le tupu ma e le fanau mai, ma ua fua ai le galuega faia'oga a le maa i se fua māmā. Ae o le mea moni e iai le ola i le maa, aua a olo le maa i le isi maa e maua le aloiafi; auā foi o le maa, e afua mai i le afi poo le volcanic action ma o loo iai pea le mana, le paoa o le afi i totonu o le maa.

I le fua lava lea o le animate ma le inanimate, fai mai le Mataupu Silisili ma le fua faasaienisi e leai se ola o i le vai. Ae o lea ua toe faamaonia nei i su'esu'ega a Saienisi, e iai le ola i totonu o le vai ma e logo i faamatalaga a tagata aemaise i upu fiafia, i upu faamalo, e faaosofia ai se malosi ma se mana faapitoa i totonu o le vai.

Letioa fo'i le upu i le gagana Samoa o le Vaiola ma le igoa o le punavai i Falefa o Tafaaola, faapea o le vaisa na aumai ele Tui Manu'a ia Tui Atua Leutele Leiite fai mai a sausau pe mili ai se tagata ua maliu i se manu'a i se taua po o se taaloga, e toe ola mai. E mafua ona vaiola ona e iai le ola i totonu o le vai e faaolaina le tagata.

O lona uiga, o loo iai le mana ma le malosi i totonu
o le maa ma le vai e avanoa ai ona faia'oga ma ia i tatou.

O se tasi o mataupu fita o loo feagai nei ma le lalolagi e
ono faa'upuina i ni fesili se lua:

1. Pe iai se lumana'i o le lalolagi?
2. Po ua lata mai le gata'aga o le lalolagi?

O se tasi o mafuaaga 'autu o lenei faafitauli, ona ua
faatuatua'ia i le mau 'autu lea e faatu mai nei; auā soo se
mea, e iai lona aogā ma e mafai ona faia'oga mai lona
aogā ia i tatou.

O le faafitauli, ua mafua ona o le fuaa'o, le faumalo ma le
faaloloto o le tagata. Fuaa'o i le faafeagai ai ma le Atua,
auā o le Atua o le tapu e mafua ai le va tapuia i le
vafeagai ai o le tagata ma le uso tagata, le tagata ma lona
si'osi'omaga, le tagata ma le la ma le masina ma le fetu
ma le paneta. A leai loa se tapu, ua le malu le
si'osi'omaga, ua le malu fo'i soo se mea i le lalolagi e aofia
ai ma le uso a tagata.

Faumalo i mafaufauga ma le pule, e mafua ai ona le malu
aia a le uso a tagata. Ua le malu fo'i se meaola po o le
lau'ele'ele i le agaga faumalo.

Ona oo mai lea o la'u faamatalaga i le faaloloto. O le a
amata mai la'u tala i le mau faa-Samoa. Fai mai ia
muamua sa o Manuvao. O lona uiga, ia muamua fai le
taulaga i le Atua o le vao ona faato'ā oia lea o le laau.
Auā e tapu le ola o le laau ma e tapu fo'i le vafeagai ai o
le tagata ma le laau – o le tapu o le ola o le laau e mafua
mai le Atua e mafua ai le ola o le laau.

Pe ana tausisia le vatapuia o le tagata ma le laau, tatou te
le vaaia le soona faatama'ia o laau, e mafua mai o le
faaloloto, ae galo ai le galuega taua a le laau, o le

faamama faamamā o le ‘ea e manava ai le tagata ma puipui i le vai e taumafa ai le tagata. O le faafitauli o le vai e te maua mai le valo’aga ua mamafi i le gagana a le ‘au saienisi, “o le isi Taua o le Lalolagi, e mafua ona o le taufaoga o le vai”.

E ataata mai fo’i le mau lenei i le faafitauli mata’utia lea e aliali mai i Darfur i Afelika. E mafua ona se’ē tagata ona o le naumati o le vai. Ae mafua le naumati ona o le soona faatama’ia o laau. E le tula’i mai nei mea pe a na tausisia e le tagata le mau “Mea uma mo A’oga”.

Auā a na tatou faataua le aogā o meaalofa a le Atua, tatou te le faatama’ia lo tatou si’osi’omaga. Tatou te le faatuatua’i i le ‘apo’apoina o le vai. Tatou te le faumalo i le vafeagai ai ma le uso tagata.

Toe fo’i mai la’u tala i le mau ‘autu “mea uma mo a’oga”. Soo se mea na faia e le Atua, e iai lona aogā ma e mafai e lena aogā ona faia’oga mai ia i tatou. A tatou aloa’ia le galuega faia’oga lenei, ona malu lea o le va tapuia. Ma a malu le va tapuia, ona avanoa lea o mea uma na faia e le Atua e momoli mai la latou galuega faafaia’oga, le galuega faamalamalama, le galuega faasinoala ia i tatou.

Soifua ma ia manuia!

*O lenei saunoaga o se meatotino a le tusitala.
Ua puipuia e tusa ma aia tatau faaletulafono.
O faia’oga mea uma lava*